

M105: Heinrich von Rugge, Leich

0,1 Ein tvmber man iv hat
0,2 gegeben disen wisen rat .
0,3 dvr daz man in ze gvote schol vernemen .
0,4 Ir wisen merchant in .
0,5 daz wirt iv ein vil groz gewin .
0,6 swer in verstat .
0,7 so ist min rat .
0,8 noch wiser denne ich selbe bin .
0,9 Min tvmbes mannes mvnt .
0,10 der tvt iv allen gerne chvnt .
0,11 Wi ez vmbe gotes wnder ist getan .
0,12 des ist mere danne vil
0,13 swer ime nieht gerne dienen wil
0,14 der ist verlorn
0,15 wan sin zorn
0,16 mvz vober in vil harte ergan .
0,1 Nu horent wises mannes wort .
0,2 von tumbes mannes mvnde .
0,3 ez wrde ein langer wernder hort .
0,4 swer got nv dienen chvnde .
0,5 daz ware gvt . un- ovch minen rat .
0,6 daz wizzzent algeliche .
0,7 Vil maneger dr umbe enphagen hat .
0,8 daz frone himelriche .
0,1 Alse miuzen wir ia teil ich mir .
0,2 die selben salecheit .
0,3 obe ich gedienen chan dar nach .
0,4 div genade ist mir bereit .
0,5 obe ich uerbir die bloden gir .
0,6 die noch min herze treit .
0,7 so wirt mir hin ze den froweden gach .
0,8 da uon man wnder seit .
0,1 Nu sint uns starchiv mare chomen .
0,2 die habent ir alle . wol uernomen
0,3 nv wnschent algeliche .
0,4 heilis vmbe den richen got .
0,5 wande er rewlte sin gebot .
0,6 a me keiser frideriche .
0,1 daz wir geniezen mivzen sin

- 0,2 des er gedienet hat .
0,3 vnde ander manege bilgerin
0,4 der dinch uil schone stat .
0,5 der sele div ist uor got schin .
0,6 der niemer si uerlat .
0,7 der selbe sedel ist vns allen ueil .
0,8 Swer in nu kovfet an der zit .
0,9 daz ist ein salecheit .
0,10 sit got svze marke git
0,11 ia uinden wir gereit .
0,12 lediclichen . ane strit .
0,13 groz lieb ane allez leit .
0,14 nv werbent nach dem w-neclicheme heile .
0,1 Nu horet man der livte uil .
0,2 ir friwnde sere clagen
0,3 ze ware ich iv dar vmbe wil
0,4 ein ander mare sagen .
0,5 minen rat ich nieman hile .
0,6 ia svn wir nieht uerzagen .
0,7 unser leit daz ist ir spile .
0,8 wir mugen wol stille dagen .

7a,1 Swer si weinet der st ein kint .
7a,2 daz wir niet sin da si da sint .
7a,3 daz ist ein schade . den wir michels gerner movhten weinen .
7a,4 diz kurze leben daz ist ein wint .
7a,5 wir sin mit sehenden ovgen blint .
7a,6 daz wir nu got . uon herzen niet mit rehten triwen meinen .

7b,1 Ir dinch nach grozen eren stat .
7b,2 ir salec sele enphangen hat .
7b,3 sunder strit . un- ane nit . die lichten himelkrone .
7b,4 wie saleclichen z deme ergat den er
7b,5 den stul besizen lat .
7b,6 un- ime da git nu ze aller zit . nach wnneclichem lone .

7cb,1 gehabent iv stolce helde wol .
7cb,2 er st salec der da sterben sol .
7cb,3 da got erstarp do er warf . daz heile der cristenheit .
7cb,4 div helle div ist ein biter hol .
7cb,5 daz himelrich genaden uol .
7cb,6 nv volgent mir . so werbent ir . daz man iv dar uerleitit .

8a,1 Der tivfel hvob den selben spot .
8a,2 enslafen was der riche got .
8a,3 dvr daz wir brachen sin gebot .
8a,4 in hat sin genade erwechet .
8a,5 wir waren lazen vnderwegen

- 8a,6 nu wil er unser selbe flegen .
8a,7 er hat uil manegen stolcen degē .
8a,8 die bosen sint erschrehet .
- 8b,1 Vil maneger nach der werlde strebet .
8b,2 deme si doch bosez ende git .
8b,3 un- nieman weiz wie lange er lebet
8b,4 daz ist ein michel not .
8b,5 Ich rate iv dar ich selbe wil .
8b,6 nv nement daz chrvce un- uarent da hine .
8b,7 daz wirt iv ein uil groze gewin .
8b,8 vnde furhtent nicht den tot .
- 8cb,1 Der tumbe man von ruge hat
8cb,2 gegeben disen wisen rat .
8cb,3 ist ieman der in nv verstat .
8cb,4 iecht anders wan ze gvote .
8cb,5 den riwet so der schade ergat .
8cb,6 daz ime der groz missetat
8cb,7 nieman necheinen wandel hat .
8cb,8 ze spate ist der s behvot .
8cb,9 Diz ist ein leich von deme heiligen grabe .
- 9b,1 Swer nu daz chruce nimet
9b,2 wie wol daz helden cimit .
9b,3 daz chvmt uon mannes muote .
9b,4 got der gvote in siner hvote
9b,5 ze allen zit hat .
9b,6 der niemer si verlat
- 10a,1 so sprichet lihte ein boser man .
10a,2 der herze nie gewan .
10a,3 “wir sun hie heime vil sanfte beliben .
10a,4 die zit wol uertriben vil schone mit wiben .”
- 10b,1 So sprichet div der er da gert .
10b,2 “gespile er ist nicht pastes wert .
10b,3 waz schol er danne ze frivntschefte minnen .
10b,4 uil gerne ich in uerbir .” “trut gespil daz rat ich dir .”
- 10cb,1 fiv daz er ie wart geborn .
10cb,2 nv hat er beidinhalt ferlorn .
10cb,3 wande er uorthe daz got ime gebot
10cb,4 dvrch in ze liden die not vn- den tot .